



SIARAN MEDIA

Lembaga Kemajuan Ikan Malaysia (LKIM)
Wisma LKIM, Jalan Desaria, Pulau Meranti
47120 PUCHONG, SELANGOR

Tel: 03-80649000 / 9165

APLIKASI MyISYTIHAR LKIM CAKNA TEKNOLOGI NELAYAN

SERDANG, 10 OGOS 2022: Timbalan Menteri Pertanian dan Industri Makanan II, Datuk Dr. Nik Muhammad Zawawi Salleh telah melancarkan Aplikasi MyIsytihar Lembaga Kemajuan Ikan Malaysia (LKIM) sempena penganjuran Pameran Pertanian, Hortikultur dan Agro Pelancongan Malaysia (MAHA) 2022.

Turut hadir dalam majlis ini, Timbalan Ketua Pengarah (Pembangunan) LKIM, Encik Kusuadi Salleh, Timbalan Ketua Pengarah (Pengurusan) LKIM Hajah Khaironesak Omar dan Pengurus Besar Persatuan Nelayan Kebangsaan (NEKMAT) Azrin Shah Ismail.

Program Pengisytiharan Pendaratan Ikan LKIM telah diwujudkan sejak Jun 2008 yang pada awalnya bertujuan untuk menjadi kawalan bagi Program Skim Subsidi Minyak Diesel dan Petrol (SSDP) dalam memastikan pembelian minyak bersubsidi tersebut digunakan bagi tujuan penangkapan ikan oleh nelayan. Pada September 2008, program ini dikembangkan lagi fungsinya bagi tujuan menilai kelayakan pembayaran bantuan Program Insentif Hasil Tangkapan Ikan (IHTI), dan juga Bantuan Elaun Sara Hidup Nelayan (ESHN) kepada golongan sasaran.

Melalui aktiviti pengisytiharan ini, LKIM akan dapat mengenalpasti harga ikan diperingkat pendaratan, spesis, kuantiti dan nilai ikan yang didaratkan mengikut lokasi oleh nelayan secara harian melibatkan seramai lebih 60,000 vesel dan lebih 1,000 buah jeti pendaratan di seluruh negara. Secara purata, lebih 2 juta data transaksi pengisytiharan dikutip setiap tahun. Secara tidak langsung, program ini berjaya memperluaskan dimensi kutipan dan persembahan data menjadi maklumat yang berguna untuk keperluan industri perikanan negara.

Sehingga kini, terdapat sebanyak 169 buah Pusat Pengisytiharan LKIM (PPI) diseluruh negara dengan kekuatan seramai 290 orang juruisytihar yang berperanan untuk merekod kesemua data pengisytiharan melalui sistem e-pengisytiharan LKIM berdasarkan dokumen transaksi jual beli oleh nelayan. Program ini seterusnya diperkembangkan lagi dengan pertambahan submodul utama iaitu Kutipan Harga Ikan bagi mendapatkan data harga ikan di peringkat borong dan runcit yang melibatkan lebih 100 buah pasar utama diseluruh negara. Tren pendaratan dan harga pendaratan ikan yang dikutip akan dibuat analisis sesuai dengan keperluan semasa untuk dijadikan rujukan kepada pemain-pemain industri bagi memajukan lagi sektor perikanan dalam menyumbang kepada pertumbuhan ekonomi negara.

Semasa dunia dilanda wabak COVID-19 dan negara berhadapan dengan Tempoh Perintah Kawalan Pergerakan (PKP), data-data ini digunakan dalam Laporan Situasi Harian (SITREP) bagi mengenalpasti tren pendaratan ikan sebenar dan jumlah bekalan ikan yang terdapat di pasaran sekaligus membantu kerajaan membuat penilaian ke atas tahap sekuriti bekalan makanan negara semasa bagi tujuan merancang strategi yang efektif.

LKIM menyedari akan faktor kesukaran yang dihadapi oleh sesetengah nelayan untuk melakukan proses pengisytiharan disebabkan oleh lokasi PPI LKIM yang jauh dari penempatan nelayan yang melibatkan masa dan kos pengangkutan. Oleh itu, bagi tujuan memudahkan lagi para nelayan melakukan proses pengisytiharan, satu aplikasi pengisytiharan sendiri telah dibangunkan yang dikenali sebagai “MyIsytihar LKIM” sebagai pelengkap kepada modul pengisytiharan pendaratan ikan sedia ada selaras dengan perkembangan teknologi semasa.

Melalui aplikasi ini para nelayan dapat membuat pengisytiharan sendiri menggunakan telefon pintar tanpa terikat dengan waktu operasi Pusat Pengisytiharan dan Pendaratan ikan LKIM sedia ada. MyIsytihar LKIM ini mempunyai integrasi data dengan sistem e-Pengisytiharan sedia ada, dimana pengguna sistem e-Pengisytiharan sedia ada boleh mengakses maklumat berkaitan MyIsytihar LKIM di dalam aplikasi tersebut.

LKIM berharap agar lebih ramai golongan nelayan dapat menggunakan aplikasi ini bagi membolehkan lebih banyak data berkaitan perikanan dapat dikumpul dalam memastikan ketepatan dalam merancang dan melaksanakan program-program perikanan kepada nelayan pada masa akan datang bagi menjamin sekuriti bekalan makanan sentiasa terjamin.

-TAMAT-

Dikeluarkan oleh:

Unit Komunikasi Korporat

Lembaga Kemajuan Ikan Malaysia (LKIM)

Kementerian Pertanian dan Industri Makanan (MAFI)

10 Ogos 2022